

Staðfesting forsetans á skipulagsskrá fyrir Tónlistarskóla Ragnars Jónssonar, útgefin á venjulegan hátt að mandatum af dómsmálaráðherra 4. júlí 1985.

Skipulagsskráin er þannig:

SKIPULAGSSKRÁ

fyrir Tónlistarskóla Ragnars Jónssonar.

Neðanskráðir aðilar stofna hér með sjálfseignarstofnun sem heitir Tónlistarskóli Ragnars Jónssonar:

- Ragnar Jónsson
- Sigfríður Georgsdóttir
- Pétur Jónsson
- Sigurður Örn Gíslason
- Guðrún Halldórsdóttir
- Ása Jónsdóttir
- Baldur Jónsson
- Jón P. Einarsson
- Svala Lárusdóttir

Stofnendur bera engar fjárhagslegar skuldbindingar vegna sjálfseignarstofnunarinnar.

Stofnunin kaupir af Ragnari Jónssyni skólahúsnæði að Heiðarseli í Reykjavík.

Samkvæmt framangreindu setja stofnendur stofnuninni eftirfarandi skipulagsskrá.

1. gr.

Tilgangur stofnunarinnar er og skal jafnan vera sá, að efla tónlistarþekkingu þjóðarinnar ekki síst meðal þess fólks, sem aðeins getur varið takmörkuðum tímstundum til þess að iðka tónlist og auka þekkingu sína á því sviði. Jafnframt skal stofnunin hafa með höndum alla hliðstæða menningarstarfsemi, og stuðla að henni.

Í þessu skyni veitir hún viðtöku gjöfum og hverskonar styrktarfé Tónlistarskólanum (stofnuninni) og allri starfsemi hennar til framdráttar.

2. gr.

Ekki má selja eða láta af hendi stofnunina eða eignir hennar fastar eða lausar nema andvirðinu sé beinlínis varið til að halda Tónlistarskólanum eða starfsemi hans áfram. Eigi má heldur binda fé hennar eða eignir nokkrum veðböndum eða skuldbindingum, sem óviðkomandi eru tilgangi stofnunarinnar.

3. gr.

Markmiði sínu hyggst skólinn ná með því að halda uppi kennslu í hinum ýmsu greinum tónlistar, frá forskólakennslu til æðri stiga. Ennfremur sé börnum jafnt sem fullorðnum gefinn kostur á að stunda tónlistarnám í tímstundum eftir því sem aðstæður leyfa. Svo og að halda uppi almennri menningarstarfsemi. Reynt verði að ná samvinnu við grunnskóla og aðrar menningarstofnanir.

4. gr.

Starfsemi skólans er frá 15. september til 30. apríl a. m. k. ár hvert. Leyfi yfir starfstíma skólans skulu vera hin sömu og í framhaldsskólum landsins. Stofnunin má vera opin allt almanaksárið fyrir aðra hliðstæða menningarstarfsemi.

5. gr.

Ekki er krafist inntökuprófs við upptöku í skólann, en skólinn áskilur sér rétt til þess að synja nemendum um skólavist, ef kennari og skólastjóri telja hann óhæfan til námsins.

6. gr.

Fjárhagsgrundvöllur skólans er byggður á eftirfarandi:

- a) Námsgjöld nemenda skólans.
- b) Styrktarsjóði Tónlistarskólans, framlög.
- c) Styrkir og gjafir sem skólanum áskotnast.
- d) Happraetti, bingó og aðrar hliðstæðar fjáröflunarleiðir.
- e) Rekstrarstyrkir ríkissjóðs og stofnfjárstyrkur, samkvæmt 12. gr.
- f) Rekstrarstyrkur borgarsjóðs Reykjavíkurborgar, samkvæmt 12. gr.

7. gr.

Stofnendur skipa fulltrúaráð stofnunarinnar. Ennfremur skal hvert félag sem gerist aðili kjósa fulltrúa í fulltrúaráðið og einn til vara. Kosning þeirra fer fram á aðalfundi eða aukafundi sem boðaður er með sama hætti og aðalfundur enda þess getið í fundarborði að kjósa eigi fulltrúa þessa. Kosning gildir í átta ár eða til þess tíma, að fulltrúinn óskar að láta af störfum eða hættir sannanlega að sinna þeim. Fulltrúaráðið skal hvatt saman minnst einu sinni á ári. Það kys stjórn samkvæmt 8. grein.

8. gr.

Stjórn Tónlistarskóla Ragnars Jónssonar skipa 3 menn og 2 til vara. Á stjórnarfundum hafa varamenn ekki atkvæðisrétt, heldur málfrelsi og tillögurétt. Kjörtímabil stjórnar er 4 ár. Skólastjóri er jafnframt framkvæmdastjóri skólans. Skólastjóra má einnig kjósa í þriggja manna stjórn stofnunarinnar. Kjósa skal formann sérstaklega, en meðstjórnendur saman og varamenn saman. Þó skal kjósa hlutbundinni kosningu ef 2 fulltrúaráðsmanna óska þess. Formaður stjórnar er jafnframt formaður fulltrúaráðs og kveður það saman. Verði sæti formanns eða meðstjórnanda laust, skipa aðrir stjórnarmenn mann úr fulltrúaráðinu í stað hans til loka kjörtímabils. Endurkosning er heimil. Skólastjóri ræður kennara og annað starfsfólk stofnunarinnar í samráði við stjórn skólans. Hann sér um reikningshald fyrir skólann og fer með öll fjármál og framkvæmdir ásamt stjórninni.

9. gr.

Reikningsár skólans er almanaksárið og skulu endurskoðendur hafa lokið endurskoðun reikninga fyrir lok maí ár hvert.

Tveir endurskoðendur skulu kosnir á aðalfundi.

10. gr.

Peningar þeir sem tónlistaskóli Ragnars Jónssonar kann að eiga eða eignast, skulu jafnóðum ávaxtaðir á sem hagstæðastan hátt, til dæmis í bönkum, sparisjóðum eða ríkistryggðum skuldabréfum. Verði einhver dráttur á framkvæmdum skal verðtryggja sjóði stofnunarinnar eftir því sem unnt er.

11. gr.

Skólastjóri ásamt stjórn setur reglur fyrir Tónlistarskóla Ragnars Jónssonar.

12. gr.

Komi að því, að fulltrúaráðið eða stjórnin sbr. 13. grein, sjái sér ekki fært að reka Tónlistarskóla Ragnars Jónssonar áfram, skal hún gefa ríkissjóði svo og borgarsjóði Reykjavíkurborgar kost á því að taka þátt í rekstri tónlistarskólans skv. 1. gr. laga nr. 12/1963, enda fullnægi skólinn þeim kröfum sem til hans eru gerðar.

13. gr.

Fulltrúaráðið getur samþykkt að gefa nýjum félögum kost á að gerast aðilar að sjálfseignarstofnuninni og tilnefna fulltrúa í fulltrúaráð hennar ef $\frac{4}{5}$ fulltrúaráðsmanna samþykkja það. Hætti einhver stofnenda störfum (félag lagt niður) fækkar fulltrúaráðsmönnum að sama skapi þegar kjörtímabili lýkur. Verði aðilar þeir sem aðild eiga að sjálfseignarstofnuninni þrír eða færri, eða félögum fækkar svo vegna ákvörðunnar þeirra um að hætta afskiptum af sjálfseignarstofnuninni, fellur fulltrúaráðið niður, en stjórnin endurnýjar sig sjálf, þannig að tveir stjórnarmenn velja þriðja mann í stjórn með sér. Verði aðeins einn aðalmaður eftir í stjórn taka varamenn þátt í vali nýrra aðalmanna í stjórn.

14. gr.

Skipulagsskrá þessari getur fulltrúaráðið ekki breytt nema með $\frac{4}{5}$ atkvæða allra fulltrúaráðsmanna, en þó því aðeins að Stjórnarráð Íslands (það ráðuneyti sem fer með staðfestingar skipulagsskráa) staðfesti þær.

Ef fulltrúaráð hefur lagst niður samkvæmt 13. gr. kemur stjórn skólans í stað þess varðandi þau málefni sem 1. mgr. þessarar greinar fjallar um með þeirri breytingu að $\frac{2}{3}$ stjórnar komi í stað $\frac{4}{5}$ fulltrúaráðs.

15. gr.

Leita skal staðfestingar forseta Íslands á skipulagsskrá þessari.

16. gr.

Skipulagsskráin þannig samþykkt á stofnfundi skólans þann 7. maí 1985.

LÖGREGLUSAMÞYKKT

fyrir Vestur-Ísafjarðarsýslu.

I. KAFLI

Um reglur og velsæmi á almannafæri.

Uppbót eða óspektir mega ekki eiga sér stað á almannafæri. Ekki mega menn þyrpast saman, svo að til tálma sé fyrir umferð eða óþæginda fyrir vegfarendur. Með almannafæri er átt við vegi, götur og svæði, t. d. hafnasvæði, sem almenningur fer um og ætluð er honum til nota. Um samkomuhús og opinberar stofnanir gilda ákvæði þessarar samþykktar, eftir því sem við á.

2. gr.

Þegar fjölmenni safnast saman á almannafæri í því skyni að sinna lögmætum erindum, skal raða sér þannig, að þeir, sem fyrstir koma, fái fyrstir afgreiðslu. Viðstöddum ber að haga sér í einu og öllu eftir þeim fyrirmælum, sem lögregla eða umsjónarmaður gefur til að halda uppi góðri reglu.

3. gr.

Þeir, sem hyggjast efna til útifundar eða fara í hóp göngu, skulu tilkynna það lögreglustjóra með hæfilegum fyrirvara. Tilkynningu um hóp göngu skal fylgja nákvæm lýsing á fyrirhugaðri gönguleið. Lögreglustjóra er heimilt að breyta leiðinni, á hvaða stigi sem er, ef hann telur brýna nauðsyn til.